



册府元龟

卷之百二十二
至二十四



13
849
43



849
43



册府元龜

淮南李嗣京叅閱

西極文翔鳳訂正

豫章黃國琦較釋

帝王部

一百二十二

征討第二

唐高祖初為唐王隋義寧二年四月金城賊帥薛舉
僭稱尊號乃下令曰大業喪亂兵革殷繁天下黔黎
手足無措孤所以救焚拯溺平此亂階蜀道諸郡深
思蘇息遠勤王略誠有可嘉方一戎衣靜茲多難而

册府元龜

帝王部

卷一百二十二

薛舉狂僭吞噬西土隴蜀通途恐相侵暴今便命將
授律分道進兵其衝要諸郡縣宜率勵各募部民隨
機底定斯則暫勞永逸貽厥子孫白國刑家同享安
樂

武德元年六月以秦王為西討元帥征薛舉八月薛
舉死賊黨推其子仁杲僭尊號復以秦王為西討行
軍元帥擊仁杲於涇州十一月平之

九月遣工部尚書獨孤懷恩攻堯君素於河東十二月平之

十月岐州賊帥邵江海自號新平王遣隴州刺史叔

孫老擊之江海率其眾來降是月南陽賊帥朱粲侵

浙州遣太常卿鄭元璫率步騎一萬擊之二年四月粲奔世充

三年五月王世充侵濟州遣右驍衛大將軍劉弘基
拔之

六月劉武周陷介州遣左武衛大將軍姜寶誼擊之

十月夏縣人呂崇茂殺縣令舉兵反自稱魏王以應

劉武周遣永王孝基工部尚書獨孤懷恩陝州總管

于筠內史侍郎唐儉等擊之三年四月武周奔于突厥五月崇茂平

三年七月詔曰取亂侮亡聖主於是致治民和眾泰
湯武所以成功兵革之興義資靖難出軍命將蓋非

獲已自隋氏數窮天下鬪沸豺狼交爭黔庶凋殘朕
 受命君臨志存寧濟率土之內咸思覆育聲教所覃
 莫不清晏唯彼伊維尚隔朝風世充作梗肆行凶暴
 害虐良善擁迫吏民反道亂常日月滋甚禍盈疊積
 天亡有徵心腹積攜黨援孤絕農畝荒廢糧廩內空
 城隍社稷勢黨殄潰吊民間罪今實其時可令陝東
 道行臺上柱國秦王世民總統諸軍東踰崤澠分命
 驍勇百道俱進救彼塗炭誅其克渠凡此授律義在
 拯民府庫資財一無所利尅敵制勝効策獻功官賞
 之差並超常典其有背賊歸款因事立勲卽加寵授

務隆優厚

四年二月戊申遣左武侯大將軍竇抗率精騎三千

赴東都

三月世充降

六月遣趙郡王孝恭率巴蜀兵沿流下廬江王瑗自

襄陽道黔州刺史田世康自辰州道黃州總管周法

明白夏口道以圖蕭銑

十月尅之

七月竇建德餘黨劉黑闥范願王小胡以漳南舉兵

反棗疆人以城叛歸黑闥詔發關中步騎三千令將

軍秦武通定州總管李文通擊之又遣幽州總管燕

郡王李藝率兵南會

十二月劉黑闥陷冀州遣左屯衛大將軍義安王孝常率兵擊之

五年六月劉黑闥引突厥之衆寇山東遣燕郡王藝擊之又遣淮安王神通討徐圓朗七月貝州州曹該董康買舉兵反以應黑闥以淮陽王道玄爲河北道行軍總管以討之

十一月遣齊王元吉擊黑闥於山東

六年五月平之

六年八月東南道行臺僕射輔公柘據丹陽反僭稱宋王遣趙郡王孝恭率兵趨江州

九月輔公柘遣其黨徐紹宗侵海州陳政通侵壽陽

詔趙郡王孝恭水路趨九江嶺南道大使李靖引交廣泉桂之衆趨宣城懷州總管黃君漢出譙亳齊州總管李世勣出淮泗以討公柘詔曰禁暴戢兵昔王於是致治亂常干紀有國所以明刑東南道行臺尙書左僕射上柱國輔公柘本自凡庶素無藝用往因擾亂連結徒旅與吳王杜伏威同心協力保據江淮早率數部遠歸朝化錄其功效授以官爵任官方隅榮寵兼至不能勵身奉上克保名節遂乃包藏禍心圖爲不軌自伏威入朝之後公柘恣行專擅違犯朝憲不顧典章徵歛穀帛掠奪子女肆其殘忍妄行誅

殺驅役士民招聚奸盜毒流衆庶怨結遐邇國家務
 存含養未申刑罰每加懲誡冀其自改今乃稱兵內
 侮假相署置驅扇蟻徒敢行鈔竊惟彼克逆速宜勦
 定命將授律義在安人已今天策上將太尉領司徒
 尚書令陝東道大行臺雍州牧領十二衛大將軍上
 柱國秦王世民爲江州道行軍元帥統率驍勇風驅
 電擊靡旆所臨當卽奔潰凡此罪惡止在魁渠脅從
 之徒一無所問縱有已陷賊黨非其本心拔難而來
 因立功効此等之類皆從官賞江淮以南比遭毒螫
 吏民困辱各不聊生平定之後普給優賞卽令撫慰

各令安堵勲賞之科具如別格宜明宣布咸使聞知

是時又詔徐州總管任瓌爲徐州道副元帥齊自楊

子津以討之

七年正月
公柝卒

七年六月慶州都督楊文幹舉兵反遣右武衛將軍

錢九隴靈州都督楊師道擊之又遣秦王率兵以討

文幹

七月逆徒斬
文幹來降

太宗貞觀元年五月辛丑開府儀同三司天節軍將

軍燕郡王李藝於涇州舉兵反遣吏部尙書長孫無

忌爲幽州道行軍總管右武侯大將軍尉遲敬德爲

涇州道行軍總管以擊之師未至左右斬藝傳首京

師

十七年三月齊州都督齊王祐殺長史權萬紀典軍

韋振據齊州自守詔兵部尚書李勣刑部尚書劉德

威發兵討之

兵未至兵曹杜行敏執之而降

玄宗天寶十四年十一月范陽節度使安祿山反遣

將何千里劫太原尹陽光翽害之詔以右羽林軍大

將軍王承業為太原尹衛尉卿員外置同正員張介

然為汴州刺史河南採訪節度使金吾將軍程千里

為潞州長史拒賊册榮王琬為元帥以河西節度高

仙芝為副元帥統諸軍以東征內出錢帛於京師召

募十萬眾號曰天武健兒旬日而集屯軍灞上旌旗

營帳連亘二十里昭曜原野

十一月命河西隴右節度西平郡王哥舒翰為兵馬

副元帥統兵八萬鎮潼關

十五載正月祿山陷東都詔朔方節度郭子儀收河

朔以朔方節度副使李光弼為雲中太守攝御史大

夫充河東節度副大使知節度事委以東討

七月幸蜀至晉安郡下詔曰我唐受命百四十載德

澤浸於荒裔聲教被於殊鄰紹三代之統緒綜百王

之禮樂我高祖神堯皇帝奄有大寶應天順人我大

宗文武聖皇帝戡難造邦光宅天下我高宗天皇大帝修文偃武惠綏四方我中宗孝和皇帝聿導孝德惟新其命我睿宗大聖貞皇帝清明在躬玄化溥暢朕承累聖之洪訓荷祖宗之不績兢兢業業不敢自寧往歲韋氏作逆宗社將墜是用翼戴先後掃盪克徒宸極歸真寰宇載宴爾來在位垂五十年中原幸無師旅戎狄歲來朝貢夙興旰食勤念蒼生庶弘至理永致仁壽媿無帝堯之聖德而有寄絲之不明致令賊臣內外爲患蔽朕耳目遠朕忠良或竊威弄權或厚歛重賦蟻壤一漏成此滔天構逆召戎馳突中

夏傾覆我河雒擾亂我嶠函使衣冠奔竄於草莽黎庶狼狽于鋒鏑伊朕之涼德不能寧守厥位貽禍海內有負蒼生是用罪已責躬寤寐焚灼上媿乎天地下媿乎兆民外媿乎四夷內媿乎九族乾乾惕厲思雪大恥夫定禍亂者必仗於群才理國家者先固其根本太子亨忠肅恭懿悅禮敦詩好勇多謀加之果斷承王璘盛王琦豐王珙皆孝友謹恪樂善好賢雖頃在禁中未習政事察其圖慮可試艱難夫丞相之才師傅之任必資賢哲允屬忠貞况四海多虞二京未復今所慎擇實惟其人太子亨宜充天下兵馬元

帥仍都統領朔方河東北平盧等節度使與諸路及諸副大使等計會南收長安雒陽以御史中丞裴冕兼左庶子隴西郡司馬劉秩試守右庶子永王璘宜充山南東路及黔中江南西路節度支度採訪使江陵都督如故以少府監竇紹爲之傳以長沙郡太守李峴爲都副大使仍授江陵都督府長史兼御史中丞盛王琦宜充廣陵大都督仍領江南東路及淮南等道節度採訪等都使以前江陵郡都督府長史劉彙爲之傳以廣陵長史李成式爲副大使兼御史中丞豐王珙宜充武威郡都督仍領河西隴右安西北

庭等路節度採訪使以隴西太守鄧景山爲之傳應須兵馬甲仗器械糧賜等竝於當道本節度採訪支度防禦等使號王巨等竝依前充使其署置官屬及本道郡縣官等竝各任自揀擇其有文武奇才隱在山藪宜加辟命量事獎擢於戲咨爾元子等敬聽朕命謙恭祇敬以見師傅矜莊簡肅以蒞衆官慈恤惠愛以養百姓忠恕哀敬以折庶獄色不可犯以臨軍政犯而必恕以納忠規往欽哉無替朕命各頒所管咸令知悉初江嶺之人聞京師陷賊不知輿駕所在互相震駭及見是詔遠近相賀思有所効

肅宗至德元年七月卽位於靈武十月至彭原郡宰
臣房瑄抗疏請兵一萬人自爲帥以收兩京詔許之
以兵部尚書王思禮爲副分爲三軍使楊希文將軍
自宜壽入劉貴哲將中軍自武功入李先進將北軍
自奉天人

二年三月關中節度王思禮奏將士張子卿等四十
餘人割耳爲盟請爲父子軍爲國討賊又特進張元
軌悉稱所領武士一千五百人相與盟咸截左耳誓
雪國讐齋所截耳至朝堂帝嘉之

七月蜀郡城中節度健兒郭千仞謀逆上皇御玄英
樓親自招諭不從詔六軍兵馬使及蜀郡長史李恒
等領防禦兵討平之

九月以元帥廣平王豫領朔方安西迴紇南蠻大食
之衆十五萬號二十萬出討叛逆便收兩京以鎮西
北庭行營節度使李嗣業爲前軍朔方河西隴右行
營節度使郭子儀爲中軍關內行營節度使王思禮
爲後軍遂收長安廣平王城中號令三日領大兵而
東追殘賊兼收河雒

乾元元年九月詔司徒朔方節度使郭子儀淮西襄
陽節度使魯景興平軍節度使李奐滑濮節度使許

叔冀平盧兵馬使董秦北庭行營節度使李嗣業鄭
蔡節度使李廣琛率步騎二十萬衆渡河討安慶緒
於湘州又遣司空李光弼關內及潞府節度使王思
禮率所部兵續赴湘州

二年七月以趙王係為天下兵馬元帥討思明於河
朔以司空兼侍中薊國公李光弼為副元帥知節度
行營事

九月襄州將士康楚元張嘉延率衆為亂陷荆襄澧
朗等州以太子少保崔光遠兼御史大夫持節荆襄
招討仍充山南東道處置兵馬都使

十月荆襄平

三年四月襄州軍亂殺節度使史翽部將張瑾據州
為叛以陝州來瑱為襄州刺史充山南東道襄鄧等
十州節度使討平之

上元元年九月詔曰朕聞昆夷作患周王授鉞於方
叔大宛不庭漢王委兵於廣利則知昏迷之黨舞干
不足以懷柔聖哲之謀伐叛必資於用武事將禁暴
蓋非獲已司徒兼中書令朔方鄜坊邠寧等節度使
代國公子儀慶鍾五百運符魚水挺文武之宏才蘊
韜鈴之遠略積蒼生之重望有命伐之元勳負鼎和
羨已申於啟沃登壇制勝實佇於謀猷萬里長城倚

賴攸屬今殘祇未殄戎事猶殷爰資一舉之功以靖四方之難宜令子儀都統諸道兵馬使管崇嗣充副使取邠慶朔方路過往收大同橫野清夷便收范陽及河北仍遣射生衙前六軍英武長興寧國左右威遠驍騎等左廂一萬人馬軍三千步軍七千人以開府李光進充都知兵馬使特進烏崇福充都虞候右廂一萬人馬軍三千人步軍七千人以開府儀同三司李昂充都知兵馬使特進王晔充都虞候渭北官健一萬人馬軍三千人步軍八千人以開府韋京杲充使朔方留後蕃漢官健八千人馬軍八百人步軍

七千二百人以兼御史中丞任敷渾釋之同充使蕃漢部落一萬人馬軍五千人步軍五千人以兼御史中丞慕容洮與新投降首領奴賴同統押充使鄜坊等州官健一萬人馬軍一千人步軍九千人以攝御史中丞杜冕充使寧州官健一萬人馬軍一千人步軍九千人以攝御史桑如珪充使涇原防禦官健二千人馬軍五百人步軍一千五百人以大將軍闞英奇充使蒐乘練卒藉馬賊車合四海以齊心齊九夷而同力金鼓作氣鐵騎爭雄歛野噴山隱天動地以服順之師旅討從逆之克徒人事天時指期可定今

將略高闕出雲中驅蚊蚋於幽燕掃撓槍於鞏維削
平天下混一車書然後獻凱清廟策勲盟府剋寧區
夏豈不盛與兵馬既衆恐路次難爲供應仍備六十
程糧十馱遣馬畜草料所在量事支供不得妄有煩
擾百姓仍委子儀卽差人先於諸道計會分般次進
發仍與迴紇兵馬犄角相應逐便討除所關軍務應
須處置並委子儀續具狀奏聞雖有詔命竟不行
二年四月梓州刺史段子璋反襲破綿州殺遂州刺
史嗣王虢王巨東川節度李與戰敗五月劔南節度
崔光遠與李與領衆平之

代宗寶應元年八月台州賊帥李勣攻陷台州刺史
史敘脫身而逃因盡陷浙東諸州縣有衆數萬越及
浙西諸州咸理兵以禦詔河南道副元帥李光弼討
之二年四月
十月詔諸天下兵馬元帥雍王适統河東朔方及諸
道行營迴紇等兵十餘萬討史朝義會軍於陝州十
月朝
大曆十年四月詔河東鎮冀幽州淄青淮西滑亳汴
宋深潞河陽等道出師討魏博田承嗣
八月田承嗣上表請束身歸朝其將盧子期寇磁州

詔李寶臣李正己李忠臣李勉李昭田神玉朱滔李
抱玉等同赴磁州討伐

十月擒
于期

十一年七月汴宋州節度留後李靈耀竊所部兵叛
北結魏博田承嗣之同惡命淮西節度使李忠臣滑
州永平軍節度使李勉河陽節度使馬燧三鎮兵同討

之十月擒
靈耀

德宗建中四年三月詔曰淮陽軍節度使李希烈頃
以梁崇義叛逆使之專征既集勲庸大加恩禮名極
台輔賞延子孫而乃負德棄身去忠効逆攻劫道路
擅固鄧州而又圖陷汴州攘奪尉氏攻圍鄭圃暴犯

汝墳已敕神策汴滑河陽東畿汝州淮南山南荆南
湖南劍南江西鄂岳等道十五萬衆剋日齊進弔人
靖亂罪止元克有能斬希烈歸降者四品已上以希
烈官爵授之五品以下封異姓王實封四百戶諸軍
將士斬獲希烈者亦准此例封賞以軍城降者便以
其職授之賜其實封賊平後除供當道外百姓給復
三年朕德之不明化有不洽未躋仁壽尙勞用兵中
心咎悼無忘鑒寐

四月以永平宣武河陽等軍節度都統李勉為淮西
招討使襄陽賈耽江西嗣曹王臯等為之副

貞元二年
四月

希烈

十一月帝在奉天以朔方節度李懷光軍醴泉神策將李晟軍東渭橋以討朱泚

興元元年二月以鎮州王武俊兼幽州節度使令討朱滔

三月以神策節度李晟兼京畿渭北鄜坊丹延節度使以行在都知兵馬使渾瑊為朔方節度使邠寧振武永平奉天行營副元帥收復京城

五月京師平

八月以河東保寧軍節度使馬燧為奉誠軍晉絳慈隰節度行營兵馬副元帥以靈鹽節度使渾瑊為晉

緘節度使河中同陝虢等州及管內行營兵馬副元帥同討李懷光

貞元十五年九月詔曰淮西節度使吳少誠非次擢用授以旌旄秩居端揆之榮任總列城之重期申報効奉我典常而秉心匪純自底不類竟狡成性扇誘多端外肆矯誣內懷疑阻毀忠廢信棄德崇奸擅動甲兵屢越封境壽州茶園輒縱凌奪唐州詔使潛構殺傷干黷國章已在無赦朕以王者之德在乎好生人君之體務於含垢寧屈已以宥罪不殘人以興師是以上稽宗社之盛外抑忠賢之請庶其悛革當議

優容今更幸鄰境之喪逞貪亂之志焚掠縣邑殘暴
平人朕猶冀其知非爲之忍恥亟頒詔令未許出師
至乃遣軍攻逼許州肆其蠱毒恣行殺戮流害黎蒸
惡稔禍盈人神同棄興言致討實悼予衷宜令宣武
軍河陽三城鄭滑等州節度東都汝州等軍犄角相
應同逼申光蔡州常冀幽州淄青魏博易定澤潞太
原淮南等州徐泗山南東道鄂岳等軍各發士馬逐
便犄角齊進同爲討伐大軍四合計日殲夷嗟我忠
良受茲誑誤或心存憤激而力屈克威玉石俱焚良
增憫惻其所收得少誠管內州縣百姓官吏等宜切

加慰撫各示安存淮西將士等夙著勲庸素懷忠義
爲其脅制深可哀矜若能因事建功捨逆効順朕當
復其職位待以官封其吳少誠在身官爵竝宜削奪
其有叶心同謀擒斬少誠者先有官未有官者竝授
御史中丞大夫封異姓王賜實封五百戶賞錢萬貫
庄宅各一所子孫永爲功臣先有御史中丞異姓王
及刺史者卽超轉三資改賜官賞其才器行業爲衆
所推者便授節度使如有心懷忠憤謀斬少誠破其
屠戮者先無官者追贈三品官賜實封五百戶先有
官者贈二品官賜實封三百戶仍各與一十正員五

品官已有官者超三資與正員官其所在百姓能團結士衆討除梟斬少誠者准例封賞人臣之所保者忠天地之所助者順報功宥善朕不食言於戲朕司牧黎元爲之宗極化有所未洽信有所未孚致茲興戎增用媿悼然不暫勞無以逸俗不誅暴無以安人容爾藩鎮方州列辟連師所宜戡剪大憝未康兆人其戮力一心以副朕意應諸道准勅赴蔡州許州將士等皆竭忠誠盡心奉國竝懷感激叶力勤王若能梟斬少誠者亦准前例官賞策勲之典朕所必行如少誠平後應赴行營將士超三資改官其賞物節級

當續有處分其將士月糧在後迴給家口宣示中外咸令知悉

十六年二月以諸將與賊戰皆不利而退詔左神策行營銀夏節度使韓全義爲蔡州行營招討使陳許

節度使上官浣副之

十月詔雪吳少誠

憲宗元和元年正月戊子制曰劍南兩川疆界素定藩鎮守備各有區分頃因元臣薨謝鄰境不睦劉闢乃因虛構隙以忿報讐遂勞三軍兼害百姓朕志存含垢務欲安人遣使宣諭委以旄鉞如聞道路擁塞未息干戈輕肆攻圍擬圖吞併爲君之體義在勝殘

命將興師蓋非獲已宜令山南西道節度使嚴礪領
當道士馬與劍南東川節度使李康犄角應接仍令
神策行營節度使高崇文領馬步五千人為左軍左
右神策京西行營兵馬使李元奕領馬步二千人為
次軍並相續繼發仍仰高崇文等各差人先與嚴礪
計會齊進朕以三蜀之人本無過犯征鎮將士各著
勲勞迫於威制不能自拔各宜分明曉諭令悉朕懷
如劉闢稟奉朝經抽兵却歸本鎮朕務存誠信必當
委待如初其効順之誠臨鎮歸欵高位重賞當不食
言如尚執迷自貽覆滅法既無赦令在必行宜一乃

心恭守所職其置頓糧料等仍委度支使差官勿

無令闕失甲午高崇文領兵馬取鳳翔斜谷路李元

奕領兵取駱谷路同赴梓州應接秦惠王時用司馬

光武使吳漢伐公孫述魏司馬文王使鄧艾伐劉禪

晉穆帝使桓溫伐李仁宋武帝使朱齡石伐譙縱

梁武帝使鄧元起伐劉季連周太祖使尉遲迥平蕭

紀隋文帝使梁睿平王謙憲宗命高崇文平劉闢自

秦至元和九度伐蜀四為水軍泝江而上唯光泰與

鄧艾尉遲迥梁睿及崇文五在斜谷駱谷出師南討

不庭矣九月擒劉闢以獻

三月詔發河東天德兵誅夏州楊惠琳初韓全義入

朝令其甥楊惠琳知晉後俄有詔除李演為節度代

全義演赴任惠琳據城叛至是討之是月平

二年九月浙西節度使李錡據潤州反殺判官王澹大將趙琦又領蘇常湖杭睦五州戍將殺刺史修石頭故城欲謀僭逆十月詔曰朕聞好生者天地之仁不在乎肅殺止戈者帝王之武不尚乎誅鉏恭惟至言可謂明誠朕祇荷前訓纘承丕圖每思道以自弘豈佳兵而爲念雖荆陲阻命有戡亂之征蜀部興妖獻夷凶之捷而所傷皆及於百姓所費寧止於千金靜言思之徃徃興嘆非不得已豈復用師李錡屬列宗枝任居方伯窮赫奕之貴飽綢繆之恩待以親賢報之以禮節授以師旅川之以亂常宵圓首方足之

形無五常百行之性頃者累陳章疏勤請來朝姦態不形僞言甚懇朕頗謂誠志久方允從乃降詔書俾修覲禮示以後命委其深心而梟首驟呼虺毒橫厲初則詐疾後仍縱兵寮屬以獻規受屠使臣以傳命見脅朕務於含垢未忍明言累降中人令遵前旨無輶車之戒路有沴氣之滔天加以日逞淫征寃痛者無告日興暴賦杼軸者皆空赤子咸罄於饑糴白刃屢膏於頸血爲人父母聞甚惻然顧惟紀綱豈敢廢墜其討伐之師竝已有處分剋期齊進其李錡在身官爵階勳等竝宜削除仍令宗正寺削一房屬籍其

兩都及諸州府應有李錡庄宅錢物等並委所繇官簿錄聞奏浙西將士素非同惡朕所深知迫於克威不能自達但王師進討因事立功梟斬渠魁以效誠節必當特加爵秩超異等倫其將吏等以所領歸降者超三資官以一身降者亦超資改轉官健歸順者厚加賞給仍與敘錄明諭將士罪止一夫其餘染汙一切不問於是詔淮南節度使王鐔充諸道行營兵馬招討處置使仍以內官有監門衛大將軍薛尚衍充都監招討宣慰等使徵宣武義寧武昌之師各二千并淮南宣歙之師並取宿州路進討江西兵士三

千取信州路進討浙東兵士取杭州路進討

是月平錡

四年十月鎮州王承宗拒命制曰天地以大德煦物而高秋厲肅殺之威帝皇以至道育人而前王設誅討之典於是乎有阪泉之役有丹浦之威情豈佳兵義存禁暴朕嗣膺寶曆於茲五年以揚厲居於人上以仁恕撫於天下恭惟文祖之訓敢以武功爲先昨者吳屬興妖師徒獻捷朕每念陳原野之衆行鈇鉞之刑雖舉彞章頗懷慙德蓋不獲已豈樂於斯王承宗頃在苦廬潛窺戎鎮而內外以事君之禮將而必誅分土之宜專則有辟朕念其先祖規嘗有茂勲貸

以私恩抑於公議使臣旁午以告諭孽童俯伏以陳誠願獻兩川期無貳事朕亦收其後效用以曲全授節制於舊疆齒勲賢於列位况德棣本非成德所管昌朝又是承宗懿親俾撫近鄰斯誠厚德外雖兩鎮中實一家而承宗象恭懷奸霄貌稔禍欺裴武於得位之後縲昌朝於受命之中豺狼之心飽之而愈發梟鏡之性養之而益生加以表疏之間悖慢斯甚神祇所以不祐天地所以不容智士所以奮懷義夫所以興憤式遏亂略期於無刑恭行天誅示於有制其諸道諸軍進討已從別制處分王承宗在身官爵並

宜削奪其鎮州管内將士官吏等久在戎行未知朝典或陷于邪說或迫以竟威雖有忠誠無由自達但能效順卽是王人豈止惟新當加寵渥其有能廻戈殄寇因事立功時有褒崇不拘資次貴爵厚祿設之而高懸實封名藩待之以厚賞其以一州歸順者便與當州刺史仍賜實封二百戶如先是刺史以州歸順者超三資與官仍賜實封三百戶以一縣歸順者超兩資與官賜實封一百戶其長行官健歸順者當以優厚褒賞如將較内有翻然改圖梟斬元惡者授以不次之位寵以殊嘗之封王承宗如能革心悔過

東身入朝待之如初一切不問仍准舊官爵別加寵授於戲王者之師蓋除於暴亂止戈之武豈願於傷殘而承宗不能負荷舊勲祇承新命自貽其咎寧怨於天遽此興戎至於用鉞固非素意用嘆於懷百辟萬方宜諒朕志是月以左神策護軍中尉左衛上將軍吐突承璀爲左右神策河中河陽西宣歙等道赴鎮州行營兵馬使招討處置等使仍與諸軍計會內侍省內寺伯宋惟澄爲河南陝西河陽已來館驛使內侍省內寺伯曹進玉爲京畿華州河中晉州太原已來館驛使內侍省內常侍劉國爲太原易定幽州

滄州行營兵馬糧料使內侍省內常侍馬朝江爲東道行營兵馬糧料使

五年正月詔行營諸道進討鎮州又發徐泗滑等州

兵四千人赴行營

七月赦承宗罷兵

八年十二月振武兵亂逐出節度使李進賢屠其家又殺判官嚴澈河東節度使王鐔奏李進賢奔於靖邊軍振武監軍使駱朝寬奏亂衆復平且請給將士衣於本州兼言營田之不可成帝怒命夏州節度使張煦以夏州兵二千代進賢於振武又命王鐔以河東兵二千煦於振武仍許以便宜擊斷

十年正月制曰天地之化由肅殺以成歲功帝王之道以威武而輔文德朕祗荷鴻業撫臨庶邦務先弘含每慎征伐俾懷仁者有恥且格畏罪者見善卽遷而或昏迷不恭告命不及固興勃亂之孽自速原野之誅除害正刑國有彛典吳元濟逆絕人理反易天常不居父喪擅領軍事諭以詔旨曾無敬恭熒惑一方之人迫脅三軍之衆以其父少陽常經任使爲之軫悼命申奠祭臨遣使臣凌虐封疆遂致稽阻絕朝廷之禮意忘父子之恩情旋又掩襲舞陽傷殘士卒焚燒葉縣騷擾閭閻恣行寇攘無所畏忌朕嘗念賞

延之義重傷藩帥之門尚欲納於忠順之途處以顯榮之列未能飭法猶爲包荒稱以詔書俾申招撫而蠱毒滋長姦心靡悛壽春西南又陷鎮柵窮凶稔惡縱暴挺災覆載之所不容人神之所共棄良非獲已致此興戎蓋亦方伯連帥同請討除伐罪吊人故茲申命宜令宣武忠武太原武寧淮南宣歙等兵馬合勢山南東道及魏博荆南江西歙南東川等道兵馬與鄂南計會東都防禦使與懷汝節度及劔南義成軍兵馬犄角相應同爲進討吳元濟舊有官秩宜並削除大軍旣臨計卽戡殄嗟我淮右之衆本爲勤王

之師雖是脅從頻已昭洗念此勲力未嘗弭忘適罹
狡童又此誑誤必懷忠順迫在克威苟能率誠卽日
收效其淮西將士有能梟斬克渠者先是六品已下
官授三品正員官其先授五品已上官者節級昇進
仍與實封五百戶住宅各一區錢二萬貫如能率所
管兵馬以城鎮來降者竝超三資與改官仍與實封
二百戶錢一萬貫以一身降者亦與改轉仍賜錢帛
諸道應赴副行營將士如有斬元濟者亦准此處分
吳元濟如能束身歸朝竝與洗雪若不能改過罪止
其身其餘汙脅一切不問接賊界州縣百姓軍興已

來供饋繁併言念疲瘵良增憫然元和九年兩稅斛
斗錢物等在百姓腹內者并十年夏稅並宜放免其
有城鎮將士百姓守節拒賊身死王事者各委長吏
優給其家仍具事跡聞奏當加褒贈并賜錢帛仍與
一子官三州百姓莫匪吾人諸軍所至不得妄加殺
戮焚燒廬舍據奪財產并有拘執以爲俘馘事平之
後給復二年三州內有自置義營堡柵王師所至能
相率來降各加酬獎時當春候務切農桑應緣軍務
所須並不得干擾百姓如要車牛夫役及工匠之類
竝宜和顧情願仍給優價賊平之後應立功將士竝

與超資改官節級賜物於戲朕率理道靡敢荒寧思致中和以康億兆而德之寡薄化未昭宣爰用甲兵良深媿嘆顧非重武其在止戈宣示中外咸令知悉自九年秋元濟以其父衆逆命帝初推恩信以待之乃易置四面將帥命嚴師飾壘以臨之望其畏寤聽命賊乃分銳四出焚掠城邑至有犯東畿者繇是帝震怒始下詔討之

二月以劍南西川之師五百人隸嚴綬徐州之師二千五百人從李光顏又以宣武之師三千人會光顏皆討蔡州又命神策軍郃陽鎮遏將索日進以涇原兵六百人會光顏劍南東川以兵二千五百人會鄂岳團練使柳公綽討賊次於安州

十二月詔發振武兵二千會義武軍以討王承宗十一年正月制曰上帝垂象輝弧矢之芒先王取威陳鈇鉞之柄蓋所以昭宣七德保乂兆人故窮陰有助於歲功而大刑無廢於國典朕承累聖之休祉奉昊穹之眷命道思格物心豈佳兵期致俗於和同庶納人於軌度緬窺鍾鼎無忘衛國之勞永惟帶礪每存延代之賞故太尉武俊頃因多難首建大勲懸捧日之明誠遏滔天之逆豎武烈有過於雷震壯容具

紀於丹青餘風凜然雖死不朽是宜子孫襲寵邦國同休而王承宗墜乃箕裘隳其門戶不思祖考之德恐與梟獍同謀不顧天地之恩敢以豺狼爲性飽則逾悖撫之不馴竟狂屢見於表章戕賊竊加於宰輔四方同駭千古所無朕以思人愛樹投鼠忌器優柔而不斷隱忍而未征屈其憲法唯絕朝貢俾之思過將謂革心而乃先動干戈屢犯城邑焚燒剽掠流毒于人罪惡旣不可容誅討蓋非獲已况四面征鎮憤激咸同中朝鄉士奏議相繼雖覆以大道欲更含弘而迫於海魏博昭義等節度兵馬計會進討其承宗

在身官爵竝從削奪言念迺祖嘗著功庸蠢茲後童自取廢絕其所襲實封宜廻賜武俊子右金吾衛將軍士平俾之纂承無乏祭祀若承宗翻然改悟束身入朝必議加恩不唯貸法如沉迷自若討伐遂行則罪止一身其餘驅脅之徒一切不問大軍旣臨計卽戡殄其威德將士等或染惡俗或迫堯威雖忠誠無階自達但能去逆效順因事立功隨其高下厚加寵錫如有梟斬渠魁及執送京兆以效誠節者王承宗在身官爵土地等使以廻授仍與實封五百戶庄宅各一區錢二萬貫如有能率所管兵馬及以城鎮來

降者並超三資與官仍實封二百戶錢一萬貫其以州降者便與刺史仍賜實封三百戶如本是刺史更超三資與官賜實封三百戶以縣降者超兩資與官賜實封一百戶其以一營一柵降者節級褒昇務從優厚其諸軍行營將士有先登陷陣屠城下邑者亦准此處分諸應行營將士如有能梟斬承宗者亦准前例處分其接近賊界州縣自軍興已來供饋繁併嗟我疲瘵良增憫然應元和十年兩稅斛錢物在百姓腹內并十一年夏稅並宜放免其有城鎮將士百姓守節拒賊身死王事各委長吏優給其家仍具

事跡聞奏當加褒贈其有潛謀誅斬承宗被其屠戮者優加追贈并賜錢帛仍與一子官六州百姓莫匪吾人墜于塗炭深用嗟惻兵之所至不得妄加殺戮及焚燒廬舍掠奪資產并有拘執以爲俘馘事平之後給復三年其六州管內百姓能相率來歸者所在安存各加優獎方當春候務切農桑邊界之人慮妨耕織應緣軍務所須並不得干擾百姓如要車牛夫役工匠之類宜和雇優給價錢賊平之後應立功將士並與超資改轉節級賜物續有處分於戲朕正位凝命端誠嚮方勞謙在心慈儉爲寶而化未陶於頑

征討二
傲澤未浸於隱微薦興甲兵師在原野中霄愧歎當
佇憂兢庶將除姦非曰尚武宣示中外宜體至懷自
前年詔絕其朝貢承宗數以兵出境四犯田弘正不
勝其忿累疏請誅帝方許以兵加境上未令進討承
宗幸其詔旨乃大肆侵掠幽州及滄州易定之師皆
苦之請連兵誅伐乃有是命於是六鎮合勢兵十萬
餘環數千里將分承宗之力然諸軍回遠難爲主約
繇是兵加二年竟不能分其勢
十二年四月罷河
北行營專討淮西
二年詔以陳州所送東都防禦五百人廻付汝州又
詔發河東兵五千以赴易定

十月命嘗侍梁守謙監淮西行營諸軍仍以空名告
身五百道及金帛付之

十二年正月詔發河東兵一千會于義武軍移檄沈
丘武兵二千會于壽州

七月以中書侍郎平章事裴度爲門下侍郎平章事
克彰義軍節度使仍充淮西宣慰使以刑部侍郎馬
總爲副以征元濟
十月淮
西平

十三年七月詔削奪淄青節度使李師道在身官爵
仍令宣武魏博義成武寧橫海等軍分路進討其淄
青將士如能梟斬兇渠者節級超獎仍與實封五百

九府元龜 征討二

戶庄宅各一區錢二萬貫 十四年二月師道平

冊府元龜

淮南李嗣京參問

西極文翔鳳訂正

豫章黃國琦較釋

帝王部 一百二十三

唐穆宗長慶元年八月冀州刺史吳晞潛為幽州兵所逐瀛州兵亂因觀察使盧士攻其州尋為幽州兵所據以河東節度使裴度兼充鎮州四面行營都招討使以左領軍衛大將軍杜叔良為深冀諸州行營

節度使以深冀等州節度觀察使牛元翼為成德軍
節度鎮冀趙等州觀察等使時王庭湊賊殺田弘正
竊據王地朝廷以元翼鎮冀舊將素以善戰聞班位
勇畧在庭湊之右故前命為深冀節度及是又以成
德令付之希鎮州兵士望風稟令不戰而歸也

二年
二月

二年七月汴州軍亂逐節度使李愿立牙將李岑為

留後詔以鄭滑節度使韓充為宣武軍節度使又詔

陳許節度使李光顏將兵收汴州

八月斬
李岑

文宗太和元年十一月以攝橫海軍節度副使李同

捷新除兗海不受詔結幽鎮謀叛詔削同捷在身官
爵以保義軍節度使李寰為橫海軍節度使又詔發
河東陳許徐州淄青四鎮兵各五百人助寰討賊仍

賜綾絹二萬匹充賞設

三年五月
斬同捷

二年八月詔曰朕初撫天下實在便安故委同捷節
旄處以華壤顧彼童孽豈宜當之然蔑棄君親不合
容覆忠臣義士咸同忿嫉非朕生事致於興戎鎮州
王庭湊承累朝恩榮據四郡士衆將為率先問罪以
圖策勲而乃影援逆寇干犯王旅諸道使命繫為纍
囚內兵滄州抗戰四境交支郡之管籥棄鄰好之姻

親無恩於家忘義於國而猶特遣中使許其轉禍詞旨堅執曾無少悛近者又令宰臣遺書許以效順王

詰一去寂爾無聞

臣欽若等日王詰奉使滄州史失其官

朕以成德一

軍代理勲力聆風拭目待之實殊豈爲庭湊一人致使傷及百姓今迫藩臣懇請連章繼來朕猶不能獨斷宣示羣公卿士叅詳可否以觀衆情義不容誅列狀斯在先朝曾效忠懇寵獎逾等驟至三公開其自新以全令節朕之恩義亦不負矣其諸道與鎮州鄰接處宜竝絕其進奉嚴加警備其有突犯及隨指揮併合宜依詣旨處分諸道須有移軍出界竝不得焚

燒廬舍橫加殘害歸投者撫之拒命者禦之如有忠臣義士以一州或城鎮降者竝依討滄州例處分其上都進奏院宜令御史臺京兆府切加守提禁其出入待後勅處分如庭湊翻然改悔乞效忠勲上表陳誠須有聞奏亦委鄰界當時轉與進上不得停留於戲朕示帝王至仁以安兆庶以黃老清淨用寧寰宇文告屢施而不從兵革在郊而未弭致此費詞良多愧歎時王庭奏黨助李同捷恣其奸計累以兵革糧鹽濟實滄州又以兵拒朝命鄰境通使竝繫而不遣逆狀顯露中外同請誅討故有是命

九月詔曰雷電霜雪上天所以成物明罰飭法聖人垂之易象豈春陽不可以獨化將輔理固在于刑威乎則過亂禁非法天齊俗諒有爲而然也李同捷罪暴寰宇告之則悖寵之益凌亂君臣父子之紀綱棄覆育生成之恩義則綏討之命蓋不得已而王庭湊作我藩臣久膺寵命致爵位於擾叛之際齊恩澤於忘義之倫而首扇同捷使自纏纒黨惡之心劇於虎兕負法之醜逾於梟獍藩方統帥飛疏牙來朝右公卿懇章繼奏皆期鳴鼓問罪奮戈啟行朕道在包荒志存含垢多立曲戶大開坦途論之使致奇功告之

將酬重位而傲狠彌甚肆克不悛恣惡言於報章資盜糧於狡寇屢有降卒備驗奸欺潛軍入援德棣縱燎以焚瀛莫河東易定被毒騷然若尙爲包容則孰分逆順其王庭湊在身官爵竝宜削奪應諸道與鎮州接界處各逐便攻討其鎮州將士如有梟斬庭湊者六品已下官便授三品正員官先是五品已上官者節級超獎仍賜宅一所錢二萬緡如有能率所管兵馬以州郡來降超三資與官仍便正授刺史賜錢一萬緡以城鎮來降超三資與官仍賜錢五千緡如庭湊束身歸闕竝與洗雪若執迷安禍罪止其身其

餘脅汙一切不問
三年三月詔行營兵馬各量揀精銳深壁堅守分兵
務農非按襲勿更決戰軍中老弱傷疾及揀留固守
外竝抽歸本里訓勵營生應鄰道節度有鈔兵馬比
令權授指麾竝宜依前在抽移之限李祐所統兵馬
至多既逼德州自是本道糧饋不乏進取已深宜依
前當處守禦

六月詔鎮州四面行營兵馬竝宜各歸本界且自休
息其幽州河東易定齊德昭義魏博等俱要保境勿
相往來唯庭湊以四郡之地三軍之衆率誠歸闕翻

然效順則不獨棄其舊惡兼亦別義新恩唯此一事

與達表章餘勿聽信

八月赦庭湊

武宗會昌三年九月制曰定天下者致風俗於大同
安生人者齊法度於畫一雖晉之樂趙家有舊勳漢
之韓黥身爲佐命至於干亂紀律罔不梟夷禁暴除
殘古今大義故昭義節度使劉悟頃居海島嘗列瓜
牙屬師道阻兵王師問罪三面開網一境離心乘此
危機遂能歸命憲宗嘉其誠款授以南燕穆宗待以
腹心委之上黨招致死士固護一方迨於末年已虧
臣節劉從諫生稟戾氣幼習亂風因跋扈之資以專

封壤恃紀綱之力以襲兵符暫展執圭之儀終無上
綬之請隙駒爲喻魏豹姑務於絕河井蛙自居孫述
頗間于恃險誘受亡命妄作妖言中罔朝廷潛圖左
道接壤戎帥屢奏陰謀顧苕卯之所矜豈泉魚之是
察暨乎沉痾曾靡哀鳴猶駐將盡之竟恣行邪僻之
志罔或舊較自樹狡童中使授醫莫覩其朝服近臣
御命不入於壘門逆節甚明人神共棄其贈官及先
所授官爵并劉穉在身官爵宜當竝削奪成德軍節
度使王元逵魏博節度使何弘敬或姻連王室或任
重藩維懇陳一至之誠願揚九伐之命吳漢任職受

詔而初無辯嚴卜式朴忠未戰而義形於內况成德
軍常以驍騎橫陳首破朱洎戰氣方酣再迴魯陽之
日鼓音不息三周不注之山魏博軍頂以大旆涉河
竟殲師道建十二郡之旗鼓以列降人削六十年之
厲階盡歸皇化士傳餘勇軍有雄名必能稟鄭侯之
指蹤成葛亮之心伐咨爾二帥朕所注懷元逵可本
官充北面招討澤潞使弘敬充東面招討澤潞使潞
府曩者烈祖在藩先天啟聖符瑞昭晰繪事煥於泗
亭鑿輅巡遊金石刻於代邸實謂可封之俗久爲仁
壽之鄉艱難以來頗著誠節必非同惡咸許自新其

昭義舊將士及百姓等如保初心竝赦而不問如能捨逆效順以州郡兵衆歸降者必厚加封賞如能擒送劉稹者別授土地以報勲庸頃隨劉悟鄆州舊將較子孫既有義心宜思改悔如能感諭劉稹束身歸朝必當待之如初特與洗雪爾等舊較亦並酬勞仍委夷行劉沔茂元各進兵同力攻討其諸道進軍竝不得焚燒廬舍發掘墳墓擒執百姓以爲俘囚桑麻田苗各許本戶爲主罪止元惡務拯生靈於戲藩維大臣抗疏於外髦俊舊老昌言於朝戒朕以祖宗之法不可私一族刑賞之柄所以正萬邦宜用甲兵陳

於原野雖朕以恩不聽而群臣以義固爭詢自僉謀諒非獲已布告中外明體朕懷仍以徐泗節度使李彥佐爲澤潞西南面招討使河陽節度王茂元以本軍屯萬善彥佐制下後踰月未出師朝廷疑其持重乃以天德軍使石雄爲彥佐之副

四年三月以晉絳副招討石雄爲澤潞西面招討使以汾州刺史李丕爲之副

八月劉
慎平

懿宗咸通九年七月徐州赴桂林戍卒五百人官健許佶趙可立殺其主將王仲甫以糧料判官龐勳爲都頭剽掠湘潭衡山兩鎮有衆千人擅還本鎮殺節

冊府元龜 征討三
度使崔彥曾遂出徐宿官庫錢帛召募兗徒五萬詔
徵河南河東山南諸道之師討之

十年正月以神武大將軍王晏權充武寧軍節度使
兼徐州北路招討使右神策大將軍康承訓充徐泗
行營都招討使又以將軍朱克義王宥李邵史忠用
馬澹董濤戴可師朱耶赤心王建曹翔馬舉高羅銳
秦謨李播爲諸道行營招討使量分諸道之兵七萬
三千一十五人以討龐勛

二月詔司農卿薛瑊使淮南廬壽楚等州點集鄉兵

以自固

九月龐勛平

十四年三月雲朔暴亂殺刺史段文楚扶詔太原節
度使崔彥昭幽州節度使張公素出師討之

僖宗乾符三年七月草賊王仙芝寇掠河南十五州
其衆數萬詔河南藩鎮舉兵討之

四年三月以青州節度使宋威爲諸道招討草賊使
乃給禁兵三千甲馬五百匹

五年四月草賊黃巢黨尚讓大驅河南山南之民其
衆十萬大掠淮南侍中晉國公王鐸請自督衆討賊
詔以鐸爲荆南節度使諸道兵馬都統

六年八月以東都留守李蔚爲河東節度兼代北行

營招討供軍等使討雲朔李昌國廣明元年四月以前太府卿李琢為蔚朔等州諸道行營都招討使應東北面行營李孝昌李元禮諸葛爽王重榮朱玫等兵馬及忻代土團竝取琢處分中和元年二月赦昌國令討黃巢中和元年正月帝在興元詔太原節度使鄭從謹發本道之師與北面行營招討使諸葛爽代州刺史北面行營馬步都虞侯朱玫夏州將李思恭等行營諸軍竝赴京師討賊時黃巢據京師七月帝至西蜀以侍中王鐸為中書令充義成軍節度使兼京城四面行營兵馬都統以太子太師崔安

潛為副忠武軍監軍揚復恭為天下兵為行營都監以河中節度使王重榮義武軍節度使王處存鄜延節度使李孝章朔方軍節度使柘拔思恭分京城四面都統三年四月攻京城四年七月黃巢平光啟元年三月蔡賊秦宗權據汴鄭以徐州節度使時溥充蔡州四面行營兵馬都統以武宣軍節度使朱全忠充蔡州西北面行營都統文德元年十一月平宗權二年五月帝在興元邠寧節度使朱玫奉襄王煊為帝遣將王行瑜率邠寧河南之師五萬屯鳳州十二月密詔行瑜自鳳州率眾還長安斬朱玫及其黨數

百人 以行瑜為邠寧節度使

昭宗文德元年六月以蜀賊王建大亂劔南陳敬瑄

告難以司空平章事韋昭度充劔南西川節度使兼

西川招撫制置使 明年王建陷成都府自稱留後

大順元年五月以宣武軍節度使朱全忠等上表請

與河北三鎮及汴滑河陽之兵平定太原李克用願

朝廷命重臣一人都總戎事詔中書侍郎平章事張

濬為太原四面行營兵馬都統京兆尹孫揆副之率

神策軍三千赴行營又以華州韓建威德軍王鎔幽

州李康威雲州赫連鐸及朱全忠分為太原四路招

討使 十一月李克用上表訴冤遂罷兵

二年八月以鳳翔李茂貞表章不遜帝不能容嗣單

王為京師西招討使神策大將軍李鐵副之 九月師敗以茂

貞為秦王賜鐵券

乾寧二年七月太原節度使李克用舉兵渡河以討

王行瑜李茂貞韓建等稱兵向闕之罪詔以克用為

邠寧四面行營都招討使夏州李思謙充東北面招

討使涇原張鐸充西南面招討使是月削奪王行瑜

官爵改授李克用邠寧四面行營都統 十一月殺行瑜

後唐莊宗同光三年四月潞州小較揚立據城叛以

蕃漢馬步軍總管李嗣源陝西留後李紹貞爲副率師以討之詔令河中馬步兵士五千人騎發赴潞州

五月救復潞州

九月大舉伐蜀制曰朕以夙荷丕基乍平僞室非不欲寵綏四海協和萬邦廣正朔以遐同俾人倫之有序其或地居陬裔位處驕奢殊乖事大之規但蘊偷安之計則必徵諸典訓振以皇威爰興伐罪之師冀遏亂常之黨蠢茲蜀主世負唐恩間者父總藩宣任居統制屬朱溫東離汴水致昭皇西幸岐陽而乃不務扶持反懷顧望盜據山南之土宇全虧闕外之臣

誠先皇帝早在并門將興霸業彼旣曾馳書幣此亦復展謝儀後又特發使人專持聘禮彼則更不迴一介之使答咫尺之書星歲俄移歡盟頓隕朕頃遵崇遺訓嗣統列藩追昔日之來誠繼先皇之舊好又專持信幣皆絕酬還緬惟背恩食言可忍棄同卽異今觀孽豎紹據山河委閣官以持權憑阻修而僭號早者曾上秦王緘札張皇蜀地聲塵形侮瀆之言辭謗親賢之勲德昨朕風驅銳旅電掃兇渠復已墜之宗祧繼中興之曆數捷音旋報復命仍稽使來而上抗書題情動而先誇險固加以宋光葆輒陳狂計別啓

奸謀將欲北顧秦州東窺荆渚人而無禮罪莫大焉
昨客省使李嚴奉使銅梁近歸金闕凡於奏對備述
端繇其宋光嗣相見之時於坐上便有言說先問契
丹強弱次數秦王是非度此包藏可見情狀加以疎
遠忠直朋比姦邪內則縱恣輕華競貪寵位外則滋
彰法令蠹耗生靈旣德力以不量在人祇之其憤今
命興聖宮使魏王繼岌充西川四面行營都統仍命
侍中樞密使郭崇韜充西川東北面行營都招討制
置等使荆南節度使高季興充西川東南面行營都
招討鳳翔節度使李勣充都供軍轉運應接等使同

州節度使李令德充行營招討副使陝府節度使李
紹琛充行營蕃漢馬步軍都排陣斬斫使兼馬步軍
都指揮使西京留守張筠充西川管内安撫應接使
華州節度使毛璋充行營左廂馬步都虞候邠州節
度使董璋充行營右廂馬步都虞候客省使李嚴充
西川管内招撫使總領闕下諸軍兼西面諸道馬步
兵士取九月十八日進發凡爾中外宜體朕懷
十一月蜀平

四年二月貝州屯駐兵士擅離本州入鄴推趙在禮
爲兵馬留後帝怒令宋州節度使元行欽率騎三千

赴鄴都招撫之下詔徵諸道之師進討以武德使王允平為內侍省延州馬步軍都指揮使高允鐸為丹州刺史竝充鄴都行營招討使是月邢州左右步軍四百人據城叛推軍較趙大為留後討東北面副招討使李紹貞率兵討之

統親軍赴鄴討趙在禮

三月平之 又命蕃漢總管李嗣源

明宗天成二年二月制曰荆南節度使開府儀同三司守太尉尚書令南平王高季興可削奪官爵仍令襄州節度使劉訓充南面招討使知荆南行府事許州節度使夏魯奇為副招討使統蕃漢馬步四萬人

進討以其叛故也又命湖南節度使馬殷以湖南全軍會合以東川節度使董璋充南面招討使新授岐州刺史西方鄴為副招討使共領川軍下峽三面齊進

四月與劉訓等詔曰朕昨以妙選師臣往除兇孽自長驅於銳旅將併擊於孤城已發使臣疊頒詔諭料龍韜之此舉顧蟻蚶以即平今已漸向炎蒸不可持久切在訓齊貔虎速進梯衝必期此月之中須殄于天之逆貴令戰士免至疲勞兼冀生民早諧蘇息惟卿忠烈體朕憂勤儻能克副於指呼便見立成其功

效固於酬獎予無恡焉癸卯有內臣自荆南至云暑
雨方甚兵士苦之及劉訓有疾乃命樞密使孔循徑

往荆南城下

五月破其
水寨而迴

三年四月北面副招討使王晏球以定州節度使王
都反狀聞制曰王者君臨八表子育萬民務罔瑕含
垢之仁引禁暴戢兵之德每存寬恕貴就和平其有
受國深恩承家舊履乖失臣節包藏禍心萌悖亂以
欺天恣貪殘而害物苟無征討曷示紀綱義武軍節
度觀察等使簡較太尉兼中書令守定州刺史太原
郡王王都猥以凡材託於盛族梟獍之兇早縱豺狼

之性不移位極人臣跡無忠孝自朕纘承大業懷輯
群方山河之寄愈堅帶礪之盟益甚凡於事體每務
優崇骨肉淪落者竝致歸還嗣息薦論者遍加任使
一門受寵九族同榮近以家艱疊頒國命行吊遠繫
於卿士奪情尋復於公侯繼下絲綸薦及垣翰在予
之分於爾何虧而屬者所爲頗彰逆狀徵發不從於
朝命賦租罔係於省司擅致軍都遍抽編戶專修城
壘潛造甲兵說誘佐命藩臣留滯歸朝刺史賴皆忠
順尋各奏聞曾令近侍馳書責使深恩改過載惟撫
御敢怠含弘近乃長惡靡悛亂常尤甚遣姦人招軍

前節級出妖言惑管內生靈兼掛牒文已為邊患闔境之蒸黎愁沮遠遣告陳鄰藩之主帥封章共期戡定其王都宜削奪在身官爵仍令馬步兵士於州側近權置行州招誘在州軍人百姓及安撫鄉川人戶於戲不祥之器寧願舉於干戈無罪之民豈忍墜於塗炭將行吊伐倍軫情懷勉施極赦之功勿致傷夷之弊雖軍威須振在王道無虧凡百戎臣當體朕意宣布遐邇咸使聞知庶諸道舊有定州兵士處竝詔安撫勿令憂疑又制北面行營權副招討歸德軍節度使王晏球可充北面招討使權知定州軍州事北

面行營馬軍都指揮橫海軍節度使安審通充北面行營副招討兼諸道馬軍都指揮使宣殿直翟令奇等十五人起諸道軍伐定州以鄭州防禦使張虔釗為北面兵馬都監

四年二月平王都

九月詔武寧軍節度使房知溫兼荆南行營招討使知荆南行府事以尚食使馬從斌守澤州刺史中外命八道起軍赴襄陽

四年五月高從誨歸順

十月詔邠州節度使李從敬攻慶州以刺史竇廷琬拒命故也

十二月平廷琬

長興元年四月皇子河中節度使從珂遣人口奏曰

今月五日閱馬於黃龍莊衙內指揮使楊彥溫據城謀叛尋時詰問稱奉宣命臣見在虞鄉縣狀候進止帝謂安重誨曰亂臣賊子何代無之安得有此語重誨曰奸賊之言也宜速進討卽命西京留守索自通侍衛指揮使樂彥稠等率兵攻之仍授彥溫絳州刺史與以誘而擒之彥稠辭帝謂之曰與吾生致彥溫吾將回訊之遣左右羽林都指揮使張從賓率宿衛兵七指揮赴河中

是月斬彥溫

九月利闐遂三州奏東川節度使董璋結連西川孟知祥點聚鄉兵欲來攻邛州城探得發兵次安重誨

奏曰自今年三月後來山南東川諸州奏報董璋叛逆者數十陛下以事機未發含垢匿瑕臣必知有此事帝曰朕不負他以生靈之故須議興師問罪乃以左驍衛上將軍趙在禮爲同州節度使兼西南行營馬步軍都指揮使又下制曰王者興師討伐若行其時雨農夫去草誅鋤務絕其本根具載格言式符戎略而况天垂弧矢盡殪狼星國舉干戈當平賊子得不胡申號令夕議削除安邦守正翊贊功臣劍南東川節度使特進簡較太尉同中書門下平章事梓州刺史董璋受國深恩殿邦重寄但恣貪殘之性莫分

宵旰之憂唯務包藏顯章侮慢朝廷每施舍垢具爲
掩瑕略無悛革之心轉有狂迷之狀伺便而侵漁仁
境何名而黠發義軍仍於關防輒修堡砦兼傳書檄
招寇盜於晉州尋縱賊徒欲窺覲於遂府焚燒民舍
驅虜耕牛覽奏報以實繁數愆尤而莫盡豈有武度
裕身爲刺史輒敢糜留大程官手執宣頭略無遵稟
而又淫刑害物酷法作威鉄籠之炮炙未開金贖之
科罪竝發善人知懼惡貫已盈且擢髮以難窮宜燃
臍而不赦今則已徵師旅將掃妖氛舉烈火以燎毛
飛嚴霜而脫葉匪朝伊夕覆狡擒奸於戲無禮於君

奮鷹鷂而驅烏雀有功必賞誓帶礪而保山河殄寇
則理在必然興兵則是非獲已凡在遐邇宜體朕懷
其董璋在身官爵竝削奪又詔西川節度使孟知祥
兼東川西面供饋使天雄軍節度使石敬瑭充東川
行營都招討使武信軍節度使夏魯奇爲之副
十二月遣樞密使安重誨赴西面軍前時帝以蜀路
險阻進兵艱難潼關以西物價絕賤百姓般糧往利
州每費一斛不得一斗至今噍類壞壞逃窟山谷或
聚爲盜慮不堪命帝念饋輓之苦形于顏色謂近臣
曰關勞擾軍前未有成功孰能辦吾事者朕須自行

重誨奏曰此臣之責也臣今請行許之言訖面辭翼
月發赴軍前邠州節度使李敬周如京師羅延魯供
奉官周務謙丁延徽陳審瓊韓玫符彥倫等竝從重
誨西行

二年正月以權知興元軍府事王思同為山南西道
節度使充西面行營馬步軍都虞候

三年正月以前彰國軍留後孫漢韶為相州節度使
充西面行營副都部署

六月董璋為孟知祥所敗
知祥遂入梓州因而罷兵

末帝清泰三年五月鄴都屯駐捧聖都虞候張令昭
逐節度使劉延皓據城叛以汴州節度使范延光為

天雄軍四面招討使知行府事以西京留守李周為

天雄軍四面副招討使兼兵馬都監

七月收復鄴都

晉高祖天福二年六月六宅使張言自魏府使迴奏

范延光叛命遣客省使李守真往延光所問罪尋以
侍衛使楊光遠充魏府四面都部署以東都巡簡使

張從兵為副

七月安州軍亂都指揮使王暉害節度使王環於理

所遣右衛上將軍李金全領千騎赴安州

八月王暉為部下所

殺九月以李金全為節度

十一月賜魏府都部署楊光遠空名官告自司空至

常侍凡四十道將士立功者得補之而後奏三年九月延光

五年五月安州節度使李金全叛詔新節度使馬全

節以維汴汝鄭鄆宋陳蔡曹濮十州之兵討之以前

鄆州節度使安審暉為副以內客省使李守貞為都

監仍遣供奉官劉彥瑤馳詔以諭金全彥瑤既至金

全麾下齊謙以詔送於淮南雲夢人齊峴斬謙歸其

詔於門六月收復安州

六年十一月襄州節度使安從進一軍叛以西京留

守高行周為南面軍前都部署前同州節度使宋彥

筠為副宣徽南院使張從恩監焉以護聖左第四軍指

揮使安懷浦為行營馬軍都指揮以奉國右第四軍

都指揮使杜希遠為行營步軍都指揮使以護聖左

第四軍都指揮使郭金海為先鋒使東京內作坊使

陳思讓監護焉七年八月平之

十二月三州節度使安重榮稱兵向門乃遣聖奉國

宗順與國威順等馬步軍三十九指揮擊之鄆州節

度使杜威為招討使邢州節度使馬全節為副兼排

陣使前貝州節度使王周為馬步軍都虞侯維州團

練使王令溫為馬軍都指揮使奉國左第二軍都指揮

使程福贇步軍都指揮使護聖右第六軍都指揮使

史文釗為先鋒都指揮使鄴都作坊使翟令奇為先

鋒都監

七年正月斬安重榮復鎮州

少帝開運元年五月遣侍衛親軍都虞侯李守貞率

步騎二萬討楊光遠於青州以守貞為青州行營都

部署以河陽節度使符彥卿副之

閏十二月平之

漢高祖即位稱天福十二年是年閏七月新授宋州

節度使杜重威據鄴都叛詔削奪重威官爵貶為庶

人以高行周為行營都部署率兵進討

十一月重威降

隱帝乾祐二年三月河中節度使李守貞謀叛以陝

州節度使白文珂為河府城下一行都部署四月以

檀州節度使郭從義永興軍一行兵馬都部署時供

奉官時知化王益自鳳翔部署前永興軍節度使趙

贊部下牙兵趙思綰等三百餘人赴闕三月二十四

日行次永興思綰等作亂突入府城據城以叛故命

從義以討之又以侍衛步軍都指揮使尚洪千充行

營都虞侯以客省使王峻為兵馬都監

七月鳳翔節度使王景崇拒命不受代詔新除鳳翔

節度使趙暉充鳳翔行營都部署以討之

八月命樞密使同中書門下平章事郭威赴河中軍

前詔河府永興鳳翔行營諸軍一稟威節制

二年七月思緒

守貞平三年正月王景崇平

周太祖廣順元年正月湘陰公劉贇丁元從右都押
衙鞏廷美教練使楊温等據徐州以拒命帝遣新授
武寧軍節度使王彥超率兵赴之廷美等遷延不肯
開門遂詔進攻仍曉諭城內軍民曰昨以鞏廷美楊
温等不認朝旨妄蓄疑心累令招携明示誠信雖有
章奏尚未開門既無果決之心必是疑君之計今以
指揮王彥超排此大軍攻討汝等若能誅斬元惡應
接官軍上城者若是將較員寮只與超拜官資兼授

刺史百姓卽給厚賞穩使安排但收此絹書以爲憑

信

三月收復徐州

十月以并寇劉崇犯邊攻圍未解遣樞密使平章事
王峻將兵援之

三年正月以兗州慕容彥超反狀已具無以招懷乃
命侍衛步軍指揮使曹英爲都部署起兵討之仍以
齊州防禦使史延超爲副皇城使向訓爲都監陳州
藥元福爲行營馬步都虞侯龍捷右廂都指揮使王
全斌爲行營馬軍都指揮使控鶴都指揮使郭超爲
行營步軍都指揮使前貝州節度副使梁晉超爲行

營馬軍都監前棣州刺史李萼坊州刺史靳霸懷州刺史李萬超竝佐營軍

五年帝赴兗州軍前慰勞是月破之事具帝王親征門

世宗顯德二年七月以鳳翔節度使王景崇兼西面

行營都招討使宣徽南院使鎮安軍節度使向訓兼

西南面行營兵馬都監收秦鳳二州先是晉末契丹

犯關秦州節度使何建以成秦階三州入蜀蜀人又

取鳳州至是秦鳳人戶怨蜀之苛政相次詣關乞舉

王師收復舊地乃有是命

時宰臣上言請且罷西師言甚切直帝曰秦鳳二州

頃因賊臣叛入西蜀後屬中朝多事未暇恢復量其七疆且非遐僻咫尺之地聲教未被朕實有所慙今等無功退軍亦大國取弱之道舉偏師即期收復卿等所言甚嘉然無至多慮也是年九月秦州降十一

月收復鳳階成三州

十一月帝謂侍臣曰淮南獨據一方多歷年所外則

結連北虜與我為讐稔惡既深朕不敢赦今將命將

討除與卿等籌之乃以宰臣李穀為淮南道前軍行

營都部署兼知盧壽等州行府事以許州節度使王

彥超副焉又命侍衛馬軍都指揮使韓令坤已下一

十二將各帶征行之號以從焉是月勅淮南管内州

縣軍鎮官吏軍人百姓等朕自續承基構統御寰瀛

方當恭已臨朝誕修文德豈欲興兵動衆專耀武功

顧茲昏亂之邦須舉弔伐之義蠢爾淮甸敢拒大邦

因唐室之凌遲接廣寇之喪亂飛揚跋扈垂六十年盜據一方僭稱偽號倖數朝之多事與北虜而交通厚啟戎心誘爲邊患晉漢之代寰海未寧而乃招納叛亡芻助凶慝李金全之據安陸李守貞之叛河中夫起師徒來爲應援攻侵高密殺掠吏民迫奪閩越之封疆塗炭湘潭之士庶以至我朝啟運東魯不庭發兵而應接慕容觀釁而憑凌徐部沐陽之役曲直可知尚示包荒猶稽問罪邇後惟楊一境連歲阻饑我國家念彼災荒大許糴易前後擒獲將士皆遣放還自來禁戢邊兵不令侵撓我無所負彼實多奸刁

誘契丹至今未已結連兵寇與我爲讐罪惡難名人神其憤今則推輪命將鳴鼓出師徵浙右之樓船下朗陵之戈甲東西合勢水陸齊攻吳孫皓之計窮自當歸命陳叔寶之數盡何處偷生應淮南將士軍人百姓等久隔朝廷莫聞聲教雖從僞俗應樂華風必須善擇安危早圖去就如能投戈獻款舉郡來降具牛酒以犒師奉圭符而請命車服玉帛豈恡旌酬土地山河誠無愛惜刑賞之令信若丹青苟或執迷寧免後悔王師所至軍政甚明不犯秋毫有同時兩百姓父老各務安居剽虜焚燒必令禁止自茲兩地永

為一家凡爾蒸黎當體誠意

五年三月淮南平
事具帝王親征門

冊府元龜

淮南李嗣京參門

西極文翔鳳訂正

豫章黃國琦較釋

帝王部

百二十四

講武

修武備

講武

夫武者所以威四夷而遏亂略者也古者戎馬車徒
素具因蒐狩以習之皆於農隙以講武焉故周禮有
振旅芟舍治兵大閱之制教坐作進退疾徐䟽數之

節是知雖有文德必有武備傳曰三時務農一時講武故征則有威守則有財夫子曰教民七年可以即戎矣又曰以不教民戰是謂棄之蓋虛隙軍實而輕人命也乃知士不素習以其將與敵非虛語也漢儀立秋之日始揚威武魏晉而下歷代因之司馬法曰國雖大好戰必亡天下雖平忘戰必危斯國之大事其可忽諸

周武王講武類禡作桓之詩桓志武也

宣王時能內修政事外攘夷狄復文武之境土修車馬備器械復會諸侯於東都因田獵而選車徒焉東都

王城也詩人賦車攻以美之

後漢靈帝中平五年十月甲子帝自稱無上將軍耀

兵於平樂

平樂觀在雒陽城西

是時天下滋亂望氣者以為京

師當有大兵兩宮流血大將軍司馬許涼假司馬伍

巖說何進曰太公六韜有天子將兵士可以威厭四

方進以為然入言之於帝於是乃詔進大發四方兵

講武於平樂觀下起大壇上建十二重五采華蓋高

十丈壇東北為小壇復建九重華蓋高九丈列步兵

騎士數萬人結營為陳天子親出臨軍駐大華蓋下

進駐小華蓋下禮畢帝躬擐甲介馬稱無上將軍行

陣三匝而還

魏太祖建安二十一年既爲魏王有司奏古四時講武皆於農隙漢承秦制三時不講唯十月都試車馬幸長水南門會五營士爲八陳進退名曰乘之今奏革未偃士民素習自今以後無四時講武但以立秋擇吉日大朝車騎號曰治兵上合禮名下承漢制奏可是冬治兵魏王親執金鼓以令進退

文帝初嗣魏王延康元年六月辛亥立秋閱兵于東郊公卿相儀王御華蓋親令金鼓之節
明帝太和元年三月丙寅治兵於東郊

晉武帝泰始元年十一月丁酉臨宣武觀大閱諸軍甲辰乃罷

十年十一月庚午臨宣武觀大閱諸軍

咸寧元年十一月癸亥大閱於宣武觀至于己巳

三年十一月丙戌臨宣武觀大閱至於壬辰

太康四年十二月庚午大閱于宣武觀

六年十二月甲午大閱于宣武觀旬日而罷自泰始以來帝皆日臨宣武觀大閱衆軍然不自令進退也自惠帝以後禮遂廢

元帝太興四年詔左右衛及諸營教習依大習例作

鴈羽仗

成帝咸和元年十一月壬子大閱於南郊詔內外諸軍戲兵於南郊之場故其地因名鬪場自後藩鎮桓庾諸方伯往往閱習然朝廷無事焉

後魏道武登國六年七月壬午講武於牛川八年七月庚寅臨幸新壇講武

天興二年七月辛酉大閱於鹿苑饗賜各有差

五年六月治兵於東郊將西討姚興

六年五月大簡輿徒將略江淮平荆楊之亂天賜三年四月庚申幸豺山宮占授者作郎王宜弟造兵法

孤虛立成圖三百六十

明元永興二年五月北伐蠕蠕還幸參合波七月丁巳立馬射臺於陂西仍講武教戰

三年十一月丁未大閱於東郊

四年閏六月丙辰大閱于東郊

五年正月巳巳大閱畿內男子十二以上悉集

庚寅大閱於東郊部署將帥以山陽侯奚斤爲前軍衆三萬陽平王熙等十二將各一萬騎帝臨白登躬自較覽焉

太武始光元年九月大簡輿徒治兵于東郊分諸軍

五萬騎將北討蠕蠕

二年十月治兵於西郊

三年七月幸雲中舊宮至和兜山七月築馬射臺於長川帝親登臺觀走馬王公諸國君長馳射中者賜金帛繒絮各有差

四年四月治兵講武將西討赫連昌

七月伐赫連昌築壇於柞嶺戲馬射賜射中者金繒帛絮有差

神麤二年四月治兵于南郊

延和元年五月大簡輿徒于南郊將討馮文通

大延元年五月丁丑治兵于西郊

太平真君四年六月癸巳大閱于西郊

九年九月乙酉練兵于西郊將討蠕蠕

十一年八月癸未練兵于西郊

文成興安二年七月築馬射臺於南郊

九月壬子閱武於南郊

大安四年七月壬子詔曰朕每歲以秋月閒日命群官講武平壤所幸之處必立官壇糜費之功勞損非一宜仍舊貫何必改作也

和平三年十二月乙卯制戰陣之法十有餘條因大

儻耀兵以示威武更爲制令步兵陣於南騎士陣於北各擊鐘鼓以爲節度其步兵所衣青赤黃黑別爲部隊楯稍矛戟相次周迴轉易以相赴就有飛龍騰蛇之變爲函箱魚鱗四門之陳凡十餘法跪起前却莫不應節陣畢南北二軍皆鳴鼓角衆盡大譟各令騎將六人去來挑戰步兵更進退以相拒擊南敗北捷以爲盛觀自後踵以爲常

孝文延興四年八月戊申大閱于南郊

五年十月太上皇帝大閱於北郊

太和五年二月辛中山已酉講武于唐水之陽

三月幸肆州癸亥講武於雲水之陽所經考察守宰加以黜陟

九月庚午閱武於南郊

十六年八月癸酉詔曰夫文武之道自古並行威福之施必出相籍故三五至仁尚有征伐之事夏殷明獻未捨兵甲之行然則天下雖平忘戰者殆不教民戰是謂棄之是以周立司馬之官漢署將軍之職皆所以輔文強武威肅四方者矣國家雖崇文以懷九服修武以寧八荒然於習武之方猶爲未盡今則訓文有典教武闕然將於馬射之前先行講武之式可

勅有司豫修場壇其列陣之儀五戎之數別俟後勅
十七年六月丁巳講武

十八年八月幸陰山閱武臺臨觀講武

十九年正月南伐壬午講武於汝水之西大賚六軍
二十年九月戊辰閱武於小平津

二十二年八月講武於華林園

宣武景明三年九月幸鄴戊寅閱武於鄴南

後周太祖爲西魏柱國大將軍以大統九年十月大
閱於櫟陽

十年冬十月大閱於白水

十一年十月大閱於白水遂西狩岐陽

明帝武成元年三月癸未陳六軍帝親環甲胄迎太
白於東方

武帝保定二年十月壬戌講武於少陵原

天和二年十月丁亥親率六軍講武于城南京邑觀
者輿馬彌漫數十里諸藩使咸在焉六年十月壬寅
親率六軍講武於城南

建德元年十一月丙午親率六軍講武於城南二年
十一月辛巳親率六軍講武城東集諸軍都督以上
五十人於道會苑大射帝親臨射宮大備軍容

三年六月丁未集諸軍將教以戰陣之法

十一月行幸同州巳巳大閱於城東

十二月癸卯集諸軍講武於臨臯澤

宣帝以宣政元年六月卽位十一月巳亥講武於道會苑帝親環甲冑

隋文帝開皇二年十二月辛未講武于後園

煬帝大業五年四月癸亥出臨津關渡黃河至西平陳兵講武

唐高祖武德元年十月詔曰安人靜俗文教爲先禁暴懲凶武略斯重比以喪亂日久黎庶凋殘是用務

本勸分冀在豐贍而人盡未盡寇盜尙繁欲暢兵威須加練習今農收已畢殺氣方嚴宜順天時申懼威武可依別勅大集諸軍朕將躬自循撫親臨較閱五年十一月丙申幸宜州簡閱將士

八年十一月幸宜州庚子講武於同官縣

九年三月幸昆明池辛卯觀習水戰

太宗以武德九年八月卽位九月丁未引諸衛驍兵統將等習射于顯德殿庭謂將軍已下曰自古突厥與中國更有盛衰若軒轅善用兵卽能北逐獯鬻周宣驅駕方召亦能制勝太原下至漢晉之君泊於隋

代不使兵士素習干戈突厥來侵莫能抗禦致遣中國生民塗炭於寇手我今不使汝等穿池築苑造諸經費農民恣令逸樂兵士唯習弓馬若無賊來我則爲汝博士教汝弓射庶使汝等武藝優長若有賊來我卽爲汝將帥領汝鬪戰亦望使汝前無橫敵於是每日引數百人於殿前教射帝親自臨試每坐或至午時射中者隨賞弓刀布帛絲綿特加其上考

貞觀八年十二月乙卯太宗從高祖閱武於城西

高宗顯慶五年三月己酉講武於并州城西帝御龍飛閣引群臣臨觀之左衛大將軍張延師爲左軍左

右及驍武六衛左羽林騎士屬焉左武侯大將軍梁建方爲右軍領武侯六衛右羽林騎士屬焉一鼓而誓衆再鼓而整列三鼓而交前左爲曲直圓銳之陣右爲方銳直圓之陣三挑而五變步退而騎進五合而各復其位許敬宗奏曰延師整而堅建方敢而銳皆良將也李勣曰甲冑精新將士齊力觀之者猶震恐况當其事乎帝曰講閱者安不忘危之道也梁朝衣冠甚盛人物亦多然以數千渡江一朝瓦解武不可驢兵不可棄此之謂也

麟德二年四月丙寅講武於邛山之陽帝御城北門

櫻以觀之

玄宗先天二年十月癸亥親講武於驪山之下徵兵二十萬旌旗連亘五十餘里戈鋌金甲照耀天地列大陣於長川坐作進退以金鼓之聲節之三軍出入號令如一帝親環戎服持沉香大鎗立於陣前威振宇宙長安士庶奔走縱觀填塞道路兵部尚書郭元振以虧失軍容坐于纛下將斬之宰相劉幽求張說跪於馬前諫曰元振翊戴上皇有大功於國雖犯軍令不可加刑伏願寬宥以從人望帝乃捨之配流新州給事中知禮儀事唐紹以草軍儀有失坐于纛下

斬之禮畢乃下制曰傳不云乎兵之設久矣所以威不軌而昭文德聖人以興亂人以廢皆兵之繇也故文事必有武備曜德在於觀兵所以外清蠻貊內輯華夏其經濟之致歟自有隋失道三靈改卜我唐受命百姓與能四罪而天下服一戎而天下定航海梯山罔不率俾休牛歸馬永不復用德貸羣物刑清百年然而制軍爲旅先王分職在祀與戎前史垂訓則未學也孰可棄之往以韋氏構逆兇魁作禍則我之宗祀危如綴旒故斬長蛇截封豨戮梟鏡掃撓捨使武之不修則兆人何父朕以薄德皆奉聖謨濟邦家之

多難畏君父之嚴旨自撫茲億兆若臨淵谷雖重譯
 雲歸和親日至遂五兵之不教慮七德之未康今蓋
 玄冬戒時農事爰隙驪山之下鴻門在望橫層阜以
 南屬歌長川而北流嚴霜初隕疾風始至以時而命
 羣師得地以講武功料其勝負詳其進退以振國威
 用蒐軍實故披堅執銳干戈有容練卒陳師金鼓有
 節上應於天也下順於人也三光之靈可接五行之
 德斯用將孫吳不遠頗牧同時非熊所期怒蛙知勸
 布三令調九章且曰宣場之儀若觀莘墟之禮情兼
 慰賞義弘寵錫惟此畿甸比經水旱總集士馬頗有

煩勞中念元元更資勤恤其講武使各賜物一百段
 將軍各八十段中郎將各六十段郎將及左右軍長
 史各四十段折衝果毅各三十段押官六品以下各
 二十段新豐百姓宜免來年地稅置頓使賜物一百
 段緣頓踏踐麥苗給米酬直時帝既怒唐紹左右猶望寬之會有金吾衛將軍小子邈遽請宣勅遂命斬之時人皆痛惜紹而深谷於邈等尋有制罷邈官以是遂廢終身
 肅宗至德二年八月帝在鳳翔癸巳六軍大閱帝御
 府城樓觀軍陣之容

三年正月庚寅於會元殿陳兵大閱帝御樓鸞閣觀
 之

代宗寶應元年九月壬寅大閱兵馬于明鳳門街
後唐明宗天成二年十月癸未御興教門觀兵自卯
至午隊伍方絕

晉高祖天福二年十月勅習戰講武歷代通規選士
練兵其來舊制宜以每年農隙時講武仍准令式處
分

六年十二月帝習射於後苑諸軍都督指揮使已上
悉預焉

少帝開運二年二月帝次滑州丙子大閱諸軍於戚
城帝親臨之

修武備

周官大司馬之職制軍誥禁以糾邦國仲尼曰有文
事者必有武備蓋五材並用孰能去兵天下雖寧不
可忘戰自大道之隱爭心孔熾必賴兵力以寧禍亂
期以庇民而靖國保世而永命者也漢氏而下莫不
內嚴師兵之營衛外國溝池之垣翰簡閱以供時使
屯戍以防外虞益繕戎器增治戰具申之命令優其
募格誕揚武烈以貞師律稽古前訓以成善志固足
以壯中權而威不軌震天聲而警殊俗者矣傳所謂
備豫不虞古之善教者也其可忽諸

漢高祖二年令諸侯子在關中者皆集櫟陽為衛天下既定又踵秦置材官於郡國京師有南北軍之屯

六年十月令天下縣邑城縣之與邑皆令築城

武帝建元三年初置期門平帝元始中更名虎賁郎

太初元年初置建章營騎後更名羽林以天有羽林之星故取名焉又取從軍死事之子孫養羽林官教以五兵號曰羽林孤兒

二年五月藉吏民馬補車騎馬半百粵內增七較中壘

屯騎步兵越騎長水胡騎射聲虎賁凡八較尉胡騎不當置故此言七也外有樓船歲時

講肄修武備云

後漢光武中興海內人民可得而數裁十二三蕭條

靡有孑遺鄣塞破壞亭燧絕滅建武二十一年始遣

中郎將馬援謁者分築烽候保壁稍興立郡縣十餘

萬戶或空置太守令長招還流民帝笑曰今邊無人

而設長吏治之難如春秋素王矣乃建立三營屯田

殪殺弛刑謫徒以充實之也

安帝建光元年初置漁陽營兵伏侯古今注曰置營兵千人也

靈帝中平元年張角反詔公卿出馬弩

五年初置西園八較尉小黃門蹇碩為上軍較尉虎賁中郎將袁紹為中軍較尉

屯騎較尉鮑鴻為下軍較尉議郎曹操為典軍較尉趙融為助軍左較尉馬芳為助軍右較尉諫議大夫

夏年為左較尉淳于瓊為右較尉凡八人謂之西園軍皆統於碩

魏太祖初為曹公以漢建安十三年正月還鄴作玄武池以肄舟師

十四年曹公至譙作舟治水軍

文帝黃初中詔曰昔軒轅建四面之號周武稱予有亂臣十人斯蓋先聖所以體國君民亮成天工多賢為貴也今內有公卿以鎮京師外設牧伯以監四方至於元戎出征則軍中宜有柱石之賢帥輜重所在又宜有鎮守之重臣然後車駕可以周行天下無內外之慮吾今當征賊欲守之積年其以尚書令賴鄉

侯陳羣為鎮軍大將軍尚書僕射西鄉侯司馬懿為撫軍大將軍若吾臨江授諸將方略則撫軍當留許昌督後諸軍錄後臺文書事鎮軍隨車駕當董督眾軍錄行尚書事皆假節鼓吹給中軍兵騎六百人吾欲去江數里築宮室往來其中見賊可擊之形便出奇兵擊之若或未可則當舒六軍以遊獵饗賜軍士明帝景初元年詔青兗幽冀四州大作海船晉惠帝元康五年十二月丙戌新作武庫大調兵器後魏道武天興元年二月更選屯衛

五年正月帝聞姚興寇邊庚寅大簡輿徒詔并州諸

軍積穀于平陽之乾壁

天賜元年五月置山東諸治發州郡徒謫造兵甲

明元永興五年春正月己巳大閱畿內男子十二以

上悉集

大武神麈三年帝聞宋將寇邊乃詔冀定相三州造
三千艘簡幽州已南戍兵集于河以備之

延和元年五月車駕將討馮文通七月庚申遣安東
將軍奚斤發幽州民及密雲丁零萬餘人運攻具出
南道

太平真君六年八月詔發天下兵三取一各當戒嚴

以須後命

九年九月乙酉練兵于郊

孝文承明元年六月甲子詔中外戒嚴分京師見兵
爲三等第一軍出遣第二兵二等兵亦如之

太和元年十月宋葭蘆戍主楊文度遣弟鼠據仇池
詔皮喜討平之又詔喜等曰卿受命專征命薄伐邊
寇軍威所及卽皆平蕩仇池國之要蕃防守尤須完
實從前以來駱谷置鎮是以奸賊息闕關之心邊城
無危敗之禍近繇徙就建安致有往年之役卿等表
求築城豈不更勞兵將孰若因今兵勢卽令就之一

勞未逸事不再舉也今更給軍糧一月速於駱谷築城使四月盡必成就訖若不時營築及築之不成成而不固以軍法從事

十九年八月乙巳詔選天下武勇之士五萬人爲羽林虎賁以充宿衛

十月詔徐兗光南青荆雒六州嚴募戍備應須赴集二十年十月戊戌以代遷之士皆爲羽林虎賁

宣武景明元年十月詔壽春置兵四萬人

四年六月發冀定瀛湘并濟六州二萬人馬千匹增配壽春

永平二年二月詔曰北軍役頻興仗多毀敗在庫戎器見有無幾安不忘危古人所戒五兵之器事須充積經造旣殷非衆莫舉今可量造四萬人雜仗

延昌二年五月壽春大水遣平東將軍奚康生等步騎數千赴之

三年十二月出師伐蜀詔中護軍元遙爲征南將軍東道都督鎭遏梁楚

孝莊建義元年六月詔直寢紀業持節募新免收戶有投名效力者授九品官

永安三年爾朱世隆等攻京邑詔諸舊代人赴華林

園帝將親簡敘以撫軍金紫光祿大夫高乾邕侍中
為河北大使招集驍勇是年五月詔募士征葛榮
前廢帝普泰元年三月己卯詔右衛將軍賀拔勝并
尚書一人募伎作及雜戶從征者正入出身皆授實
官有私馬者優一大階

後周武帝天和元年七月築武功郿斜谷武都留谷
津坑諸城以置軍人

建德三年十二月詔荆襄安延夏五州總管內有能
率募衆軍者授官各有差

四年初置管軍器監

隋文帝潛有吞陳之志轉朔州總管吐萬緒為徐州
總管令修戰具

唐高祖武德二年七月壬申詔曰天生五材司牧資
其器用武有七德撥亂所以定功故黃帝垂衣尙有
阪泉之戰放勳光宅猶稱丹浦之師禁暴安人率繇
茲道創業垂統莫此為先是以周置六軍每習蒐狩
漢增八較畢選駢雄故能化行九有威震百蠻姦宄
不萌虔劉息志自季葉凌替軍政湮亡卒刻不修旌
旗雜伍符籍之內空有調發之名逗撓之間竟無討
襲之用遂使戎狄放命盜賊交侵戰爭多虞黔黎殄

喪朕受天明命撫育萬方爰自義師克成帝業至如
超乘之士莫匪百金穀騎之才豈唯七萃今雖關塞
寧謐荒裔肅清伊雒猶蕪江湖尚梗役車未息戎馬
載馳武備之方尤宜精練所以各因部較序其統屬
改授鉦鼓創造徽章取象天官定其名號庶使前矛
後勁類別區分玉帳絳宮刑德允備蹈茲湯火警彼
椒蘭大定戎衣止戈斯在於是置十二軍分關內諸
府以隸焉萬年道爲參旗軍長安道爲鼓旗軍富平
道爲玄戈軍醴泉道爲井鉞軍同州道爲羽林軍華
州道爲騎官軍寧州道爲折威軍岐州道爲平道軍

幽州道爲招搖軍麟州道爲苑游軍涇州道爲天紀
軍宜州道爲天節軍時帝以天下未定實資武力將
舉關中之衆以臨四方故興此制也每軍一人副一
人取威名素重者爲之督以耕戰之務自是士馬精
強無敵於天下矣

高宗儀鳳三年正月遣左金吾衛將軍曹懷舜金吾
將軍李知十分往河南北道以募猛士

玄宗先天二年正月睿宗誥曰往者皇運伊始戎政
肇修兩置軍旅初分府衛計戶充兵纔足周事遂使
二十一人入募六十出軍旣憚劬勞咸規避匿不有

整革將何置理其天下衛士取年二十五以上者充十五年卽放出頗經征鎮者十年放出自今已後羽林飛騎並於衛中簡補又勅河北諸州加團練兵令州刺史押當

開元二年八月辛巳上以河隴之故命有司大募壯勇士從軍旣募引見置酒於朝堂享之詔曰朕光宅四海撫御百蠻屬疆場未寧軍國多費每欲指揮方略親率軍師故召募爾等擬從朕行知爾等材力冠羣藝能拔萃但不教人戰豈知金鼓之聲授以兵律方辯干戈之勢所以且遣薛訥等於隴右防禦使

令教習爾等旣練韜鈴須明隊伍使投石拔劍以勵威鋒裹糧坐甲待清逋寇若能因機立效遇敵邀勳酌以官榮必超格例然後陪朕輿駕從戎塞垣俾爾先驅敬聽後命令宴勞爾等并賜錢三千貫可節級領取卽宜好去十月薛訥克吐蕃帝遂停親征詔曰比來緣邊鎮軍每年更代兵不識將將不識兵豈有緣路疲人蓋是以卒與敵其以西北軍鎮宜加兵數先以側近兵人充並精加簡擇其有勞考等色所司具以條例奏聞戰兵別簡爲隊伍專令教練不得輒有使役仍令兵部侍郎裴瓘太常少卿姜晦往軍州

計會便簡支配有見集後軍兵宜令兵部侍郎韋抗紫微舍人王珽卽簡擇以聞

八年八月詔曰國家偃武教修文德百年于茲矣自運屬清平人忘爭戰俎豆之事嘗聞之矣軍戎之禮我所未暇且五材並用誰能去兵四方雖安不可忘戰故周禮以軍禁糾邦國以蒐狩習戎旅不教人戰是謂棄之宜差使於兩京及諸州且揀取十萬人務求灼然驍勇不須限以蕃漢皆放蕃役差科唯令圍伍教練辨其旗物簡其車徒習攻取進退之方陳威儀貴賤之等俾夫少長有禮疾徐有節將以伐叛懷

服將以保大定功叶于師貞以弘武備應須集期及有蠲免所司明爲條制別作優異法奏聞仍勅幽州刺史邵寵於幽易兩州選二萬灼然驍勇者充幽州經略軍健兒不得雜使租庸資課並放免

十一年四月勅曰王者之師有征無戰將以懷柔服叛非欲黷武窮兵犯令凌政則杜之賊賢害人則伐之維其封疆辨其旗物此皆夏官之政也咨爾兵部尙書同中書門下三品朔方軍節度大使上柱國中山郡開國公王峻寅亮天地弼予一人頻總元戎克清河朔師徒效力武威遠振遺昨懷仁以思順殊類

望聲而歎服勲載王室朕甚嘉焉蓋六月出車周美仲甫古訓是式俾修我戎宜以來月巡朔方兼往河西隴右河東河北等諸軍簡較兵馬點閱器械各與所管節度處置務令得所備預之道其在茲乎十一月詔曰同華兩州精兵所出地資輦轂不合外支自今已後更不得取同華人充兵防又勅宜於京兆蒲同岐華等州府兵內及白丁中簡一十二萬人各爲長從宿衛准五尺八例一年兩蕃州縣不得更議雜驅使仍令尙書左丞蕭嵩與本州官長同揀擇以聞

二十五年五月癸未詔曰自天下一統方隅底平交趾西界於庸岷流沙東泊於遼碣烽亭旣廣徭戍轉增朕永念征夫無忘盱食是用懷柔憬俗賓禮戎臣降子女以適其氈裘捐繒玉以申其惠好二十五年于茲矣而情周萬寓信結群蠻羗狄爲父子之邦甌貉成冠帶之國海內無事邊方底寧加以志道而一理得清心而庶務簡和氣來應穰歲以臻羣生樂業而自怡有司措刑而不用今欲小康戎旅大致昇平減停征徭與人休息諸方將相三事公卿宜協朕心勉成良筭宜令中書門下與諸道節度使各量軍鎮

閑劇審利害計兵防健兒等作定額委節度使放諸色征行人內及客戶中召募取丁壯情願充健兒長任邊軍者每歲加於常例給田地屋宅務加優恤使得存濟每年逐季本使其數報中書門下至年終一時錄奏長駕遠馭事藉經久無害始慮之謀以規苟且之利

天寶十四年正月詔河南置白亭管軍武士健兒五千入馬一千匹

代宗大曆二年正月詔潼關置鎭兵三千人四年正月遣內侍魚朝恩使于鳳翔之麟遊縣置

七年正月丙辰詔諸道軍數每年秋末冬首一申春夏不須申其官健逃亡非承正制勅不得輒召募德宗貞元三年七月庚辰遣決勝軍使唐良臣以其衆六百人自咸陽戍潘原堡神策副將蘇太平率其衆五百人戍隴州

八月以宣武行營兵馬使簡較禮部尙書劉昌爲本軍京西行營節度使初昌衆憚戍靈臺剽三原後各欲散歸昌招撫之乃定因加昌以董之改戍麟遊憲宗元和四年四月中書敘錄諸道將士總八十八萬五千人舉大數其邊遠未至者亦有焉

八年十月普潤鎡兵四千人割屬涇原節度使

九年三月乙亥賜振武軍弓甲三百馱

七月甲戌命淮南浙西浙東江西荆南造甲以進仍付之樣

八月乙亥朔丙子以戎械賜宥州

十年五月詔修宥州城

十二月以馬三百匹及軍器給徐州軍又以馬三百匹給汝州行營

十一年九月丁卯桂州防禦使秦准詔以兵五百戍

邕州丙戌以樓煩監馬一百五十匹給昭義軍

十二月癸卯以振武征馬二百匹給義武軍是月方討吳元濟丙辰以襄州兵三千會于唐州

十二年正月辛酉河東節度使張弘靖奏准詔置子弟兵三千

三月義武軍節度使陳楚新置子弟義軍一萬請衣及賜可之

敬宗寶曆二年九月出內庫錢一萬貫令內園召募力士

文宗太和二年七月內出弓箭及刀三千四百隻口令度支差入送銀州防禦營田

五年五月內出陌刀一百五十口馬甲一百領器械一百萬斫刺刀一百口賜鹽州

九年十一月汝州奏頃年河北用兵東都慮有寇盜以當州將士二百人權隸東都留守府今請却屬本州可之

宣宗大中五年五月勅如聞諸道軍將及官健等近日所在將帥多務因循當召募之時已不選擇及收補之後曾莫教招遂使名在戎行少能知其弓矢職居列較罕見識于韜鈴緩急忽有徵差便取見在應數惟憂就役豈暇圖功虛費資糧莫尅讐敵爲禦頗

久須有舉明自今已後委諸道觀察節度都防禦團練經略等使每道慎擇會兵法及能弓馬餅槍弩及筒射等軍將兩人充教練使每年至合教習時分番各以本藝閱試其間或有伎藝超異者量加優賞仍作等第節級與進改職各每至年終都具所教習馬步及各執所藝人數申兵部及中書門下仍委兵部簡勘都開件聞奏所冀各盡伎能自成勁銳其支郡有兵處亦委本道點簡訓練准諸處分

僖宗光啟元年三月詔曰政在有經動惟可久事能師古安則易持今者初復舊京須申定制大漢之術

兼王霸先儒之權有弛張重舉綱條且務輯睦未遑
改作尤貴適時夫萬乘抗威四方從令雖資強幹是
切安人迺駕諸軍都士等扈從經年鄉關積念永言
忠力合假恩優節級議功爵秩無恡其情願任京邑
者便充填兩軍欲歸本道者卽仰所司各與公牒到
本道後適加糧賜別立名額給復終身如諸都中人
數稍多優賞未徧卽令所司計其積欠指揮某郡某
縣或各逐將較任去處上供財賦令自差人請領神
策軍自經亂離久未訓整孤兒漸散壯騎多亡羽林
之垂象空存天陣而疾雷不震雖言無戰豈忘有虞

宜委中書門下與本軍商量案舊籍裁減元數惟務
撫實仍令三司資助各修營壘貴使繕完又金吾諸
衛等城禁日嚴檄巡務切須令集事不可闕人亦宜
條錄修補

四月以從駕五十四都分爲十軍

昭宗天復三年五月宰臣崔裔奏募置左右軍士共
六千六百人從之

後唐末帝清泰二年正月詔諸州府本處牢城防禦
兵士都將內人數不足團併或闕稍多量許招添其
就糧禁軍內本指揮將較選偉壯長於武藝者據人

數差節級部送京師

三年七月置水軍五都以董思鐸馬暉何温安韜史希儼爲指揮使尹居璠爲都指揮起鄴城先是范延光進軍攻城以濠水濶滿兵士故立此軍

八月詔應州起兵戍茹越口詔忻州堽石嶺關左右道路

晉高祖天福三年五月昭義奏舊有銅鞮等五縣收拾到甲仗兵共六千七十副已勒作院添修旋送軍前次始帝建義自晉入雒趙德鈞兵敗奔至上黨故有此遺棄戈甲至是再令繕補齎往鄴下

少帝以天福七年卽位九年勅天下鳩集鄉兵徧民七戶共資一卒兵仗器具均以出之

開運元年八月將作使周仁美獻三接雲梯懸空橋梁高三百餘尺遣使送青州行府

周太祖廣順元年四月河中言送器械至隰州付汾州刺史王繼勳太祖收河中得繼勳聶遇皆西北山賊之魁時劉崇侵撓乃用聶遇爲石州刺史繼勳爲汾州刺史各斡險阻設虎落爲行州招收賊寇禦邊患焉

五月戊子河陽李暉言奉詔置水軍五百詔諸州於

十月以寇侵軼平陽遣中使分押處提兵士赴河陽

陝州守禦

三年六月遣中使修懷州城池

世宗顯德元年十月謂侍臣曰侍衛兵士累朝已來老少相半強懦不分蓋徇人情不能選練今春於高平與劉崇及蕃軍相遇臨敵有指揮不前者苟非朕親當堅陳幾至喪敗况百戶農夫未能贍得一甲士且兵在精不在衆今已令一一點選精銳者昇在上軍怯弱者任從安便庶期可用又不虛費也侍臣感

曰若非陛下天縱睿謀無以有此莫斷先是用兵已來勲武得志至於偏裨之間鮮舉雄勇率以親舊互用而有懦怯不能自奮者其行伍可知矣上案兵於高平觀其退縮慨然有懲革之意

四年一月帝再征淮南令右驍衛大將軍王環率舟師數千以從焉先是帝用師於壽春城下觀吳人銳於水戰時我舟師未備無以制之帝憤激及還京遂於京城西汴河之浹造戰船數百艘及成又命於降卒中選水工數百與我師同習水戰數月之後縱橫出沒殆勝於吳師矣至是命環董之俾自蔡河南入

于頴以泝淮上馬

三月甲午詔發近縣丁夫數千人鎮淮軍有三城夾淮相對仍令徙下蔡浮橋維於其間

五年三月巳酉命右神武統軍宋延渥帥舟師三千泝江而上以江北初定巡警故也

五月壬午賜淮南行營招收馬步軍軍號馬軍曰雄健步軍曰武健

附府元龜

